

Na osnovu člana 13. stav 2. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj: 49/06 i 51/09), člana 65. Zakona o pravima, obavezama i odgovornostima pacijenata ("Službene novine Federacije BiH", broj: 40/10), člana 14. Zakona o zdravstvenoj zaštiti ("Službene novine Federacije BiH", broj: 46/10 i 75/13), člana 23. i 25. Statuta Općine Stari Grad Sarajevo – Prečišćeni tekst („Službene novine Kantona Sarajevo“, broj: 20/13), Općinsko vijeće Stari Grad Sarajevo, na 37. Redovnoj sjednici održanoj dana 30.05.2024. godine, donijelo je

**(NACRT)**

## **ODLUKU**

### **O OSNIVANJU ZDRAVSTVENOG SAVJETA OPĆINE STARI GRAD SARAJEVO**

#### **I – OPĆE ODREDBE**

##### **Član 1.**

###### **(Predmet)**

Ovom Odlukom osniva se Zdravstveni savjet Općine Stari Grad Sarajevo (u daljem tekstu: Zdravstveni savjet) i utvrđuje njegova nadležnost, broj članova, sastav, te način rada.

##### **Član 2.**

###### **(Nadležnosti)**

Zdravstveni savjet obavlja sljedeće poslove:

- predlaže i evaluira sprovođenje zdravstvene zaštite na području jedinice lokalne samouprave;
- daje mišljenje na planove i programe zdravstvene zaštite za područje lokalne samouprave, te predlaže mjere za poboljšanje dostupnosti i kvaliteta zdravstvene zaštite na svom području;
- prati primjenu propisa na području jedinice lokalne samouprave koji se odnose na zaštitu prava i interesa pacijenata, uposlenih i zdravstvenih radnika;
- organizuje obrazovne kurseve za građanstvo, okrugle stolove, panele, tematska predavanja i radionice sa ciljem upoznavanja građana o pravima pacijenata, te iz oblasti poznavanja materije o pravima pacijenata i postojeće legislative;
- daje preporuke za organizaciju kurseva u zdravstvenim ustanovama radi upoznavanja rukovodstva i zdravstvenih radnika s konceptom prava pacijenata, legislativom i odgovarajućim nužnim promjenama u zdravstvenim ustanovama;
- prati povrede pojedinačnih prava pacijenata na području jedinice lokalne samouprave;
- predlaže preduzimanje preventivnih mjera u cilju zaštite i unapređenja prava pacijenata i zdravstvenih radnika na području jedinice lokalne samouprave;

- bez odgađanja obavještava zdravstveni savjet u kantonalnom ministarstvu o slučajevima težih povreda prava pacijenata koji mogu ugroziti život ili zdravlje pacijenata i zdravstvenih radnika;
- podnosi Općinskom vijeću i kantonalnom ministarstvu godišnji izvještaj o svom radu;
- obavještava javnost o povredama prava pacijenata i zdravstvenih radnika;
- obavlja i druge poslove predviđene zakonom.

### **Član 3.**

#### **(Učešće u postupku donošenja zakonskih i podzakonskih akata)**

Zdravstveni savjet u okviru poslova i zadataka koje obavlja aktivno će biti uključen i imat će partnersku ulogu zajedno sa zdravstvenim ustanovama i nadležnim ministarstvima i drugim organima i institucijama, u donošenju zakonskih i podzakonskih akata i drugih mjera u cilju adekvatnog zadovoljavanja potreba zdravstvene zaštite lokalnog stanovništva, a posebno u situacijama kada je u pitanju otklanjanje određenih riziko-faktora za zdravlje stanovništva (vodopsnabdijevanje, uklanjanje deponija i slično).

## **II – SASTAV ZDRAVSTVENOG SAVJETA**

### **Član 4.**

#### **(Broj članova)**

- (1) Zdravstveni savjet ima ukupno devet (9) članova uključujući predsjednika i zamjenika koje imenuje Općinski načelnik na osnovu rezultata javnog poziva, za čije raspisivanje saglasnost daje Općinsko vijeće.
- (2) Članovi Zdravstvenog savjeta imenuju se iz reda:
  - predstavnika pacijenata;
  - mladih;
  - općinskog organa uprave;
  - komora iz oblasti zdravstva;
  - stručnih udruženja, udruženja za zaštitu prava pacijenata;
  - crvenog krsta/križa s područja općine;
  - zdravstvenih radnika iz javnih zdravstvenih ustanova na području općine;
  - zdravstvenih radnika privatnih praksi sa područja općine;
  - penzionera;
- (3) U Zdravstveni savjet iz reda članova predviđenih prethodnim stavom ovog člana alineja 1., 2., 3., 4., 5., 8. i 9. mogu se imenovati lica koja imaju prebivalište na području općine.

### **Član 5.**

#### **(Praćenje rada stručnih udruženja)**

- (1) Praćenje rada i djelovanja stručnih udruženja i udruženja za zaštitu prava pacijenata iz člana 4. stav 2. alineja 5. ove Odluke vršit će u ime Zdravstvenog savjeta njegov predsjednik i to

kroz redovite izvještaje koje će ova udruženja dostavljati i koja će predsjednik savjeta prezentovati na sjednici savjeta.

- (2) U slučajevima kada se ocijeni da su aktivnosti i djelovanje udruženja na brizi i zaštiti pacijenata nedovoljne ili ukoliko udruženje prestane s radom izvršit će se imenovanje drugog predstavnika ovih udruženja.
- (3) Imenovanje iz prethodnog stava ovog člana izvršit će Općinski načelnik i to po osnovu rezultata raspisanog Javnog poziva.

### **III – PLAN I PROGRAM RADA I IZVJEŠTAJ O RADU**

#### **Član 6.**

##### **(Plan i program rada)**

Zdravstveni savjet predlaže Općinskom vijeću Plan i program rada za kalendarsku godinu.

#### **Član 7.**

##### **(Izvještaj o radu)**

- (1) O svom radu i aktivnostima Zdravstveni savjet podnosi Izvještaj Općinskom vijeću Stari Grad Sarajevo svaka tri mjeseca, uz obavezu dostavljanja i jedinstvenog godišnjeg izvještaja u januaru tekuće godine za prethodnu godinu.
- (2) Neusvajanje godišnjeg izvještaja o radu je osnov za razrješenje članova Zdravstvenog savjeta prije isteka mandata.

### **IV – POSLOVNIK O RADU**

#### **Član 8.**

##### **(Poslovnik o radu)**

Zdravstveni savjet donosi Poslovnik o radu savjeta kojim se pobliže određuju organizacija i način rada.

### **V – MANDAT I NAKNADA**

#### **Član 9.**

##### **(Mandat)**

Članovi Zdravstvenog savjeta imenuju se na period od 4 (četiri) godine.

## **Član 10.**

### **(Naknada)**

Članovima Zdravstvenog savjeta pripada naknada za rad koja će biti utvrđena rješenjem Općinskog načelnika.

## **VI – PRELAZNE I ZAVRŠNE ODREDBE**

## **Član 11.**

### **(Administrativno-tehnički poslovi)**

Administrativno – tehničke poslove za potrebe Zdravstvenog savjeta obavljat će Stručna služba Općinskog vijeća Stari Grad Sarajevo.

## **Član 12.**

U roku od 3 (tri) mjeseca od dana stupanja na snagu ove Odluke, Općinski načelnik je obavezan provesti procedure izbora i imenovanja članova Zdravstvenog savjeta shodno odredbama ove Odluke.

## **Član 13.**

### **(Prestanak važenja)**

Stupanjem na snagu ove Odluke prestaje da važi Odluka o osnivanju Zdravstvenog savjeta Općine Stari Grad Sarajevo ("Službene novine Kantona Sarajevo" broj: 11/17).

## **Član 14.**

### **(Stupanje na snagu)**

Ova Odluka stupa na snagu osmog dana od dana objavljivanja "Službenim novinama Kantona Sarajevo".

**PREDSJEDAVAJUĆI  
OPĆINSKOG VIJEĆA STARI GRAD  
SARAJEVO**

**Škaljić Seid**

Broj: 02-45- /24  
Sarajevo, \_\_\_\_\_, 2024. godine

## **O B R A Z L O Ž E N J E**

### **I – PRAVNI OSNOV**

Pravni osnov je sadržan u preambuliiste.

### **II – RAZLOZI DONOŠENJA**

Članom 11. Odluke o osnivanju Zdravstvenog savjeta Općine Stari Grad Sarajevo (“Službene novine Kantona Sarajevo” broj: 11/17), utvrđeno je da navedena Odluka će se primjenjivati do donošenja izmjena i dopuna Statuta Općine Stari Grad Sarajevo. Uvažavajući naprijed navedeno, kao i da je Općinsko vijeće Stari Grad Sarajevo na sjednici održanoj dana 30.04.2024. godine usvojilo Statut Općine Stari Grad Sarajevo, pristupilo se izradi ove Odluke.

### **III – OBRAZLOŽENJE**

Odluka se sastoji od 6 (šest) poglavlja, i to:

- I – OPĆE ODREDBE
- II – SASTAV ZDRAVSTVENOG SAVJETA
- III – PLAN I PROGRAM RADA I IZVJEŠTAJ O RADU
- IV – POSLOVNIK O RADU
- V – MANDAT I NAKNADA
- VI – PRELAZNE I ZAVRŠNE ODREDBE

### **IV – FINANSIJSKA SREDSTVA**

Za provođenje procedure usvajanja ove Odluke nisu potrebna finansijska sredstva, dok su za realizaciju iste potrebna finansijska sredstva koja je potrebno predvidjeti u Budžetu Općine.